

Hadi jadikan sokongan Najib talian hayat PAS - Tun M
Free Malaysia Today
Jun 11, 2016
Adam Abu Bakar

Tindakan presiden PAS itu menyebabkan separuh pemimpin PAS berpindah parti dan tidak lagi mempercayai kepimpinan Hadi.

SEKINCHAN: Setelah bergerak secara sendirian dalam politik, PAS kini cuba mendapatkan sokongan daripada Datuk Seri Najib Razak bagi memastikan hayat parti Islam itu kekal.

Bekas perdana menteri Tun Dr Mahathir Mohamad berkata oleh itu Presiden PAS Datuk Seri Abdul Hadi Awang tidak akan menyerang, sebaliknya akan menyokong segala salah laku Najib.

“PAS ini keseorangan diri, setelah dia berpisah secara langsung dengan Pakatan Rakyat, sebab itu dia ingin dapatkan sokongan daripada Najib khususnya.

“Dan dia (Hadi) tidak akan serang Najib bahkan akan menyokong perbuatan salah Najib,” katanya pada sidang media, di Restoran Hao Xiang Chi, hari ini.

Beliau berkata tindakan Hadi itu menyebabkan separuh daripada pemimpin PAS berpindah parti dan tidak lagi mempercayai kepimpinan presiden parti Islam berkenaan.

“Sebab itu Hadi cuba melamar UMNO atau khususnya Najib kerana dapat banyak nikmat mungkin dapat dedak daripada Najib,” katanya di depan kira-kira 500 pengundi yang majoritinya berbangsa Cina.

Mahathir turut mengulangi gesaannya bahawa hudud yang diperkenalkan PAS bukan hudud yang Islam perintahkan, sebaliknya hudud PAS.

“Itu hudud PAS dan ia bertentangan dengan hudud Islam. Kerana dalam Islam yang diutamakan adalah keadilan.

“Hukum ini mengasingkan orang Islam dan bukan Islam tidak adil dan tidak Islam. Gunanya untuk menipu rakyat bahawa dia berjuang untuk Islam.

“Di negara yang 100% Islam tidak menjadi masalah, tetapi di negara ini 40% orang bukan Islam sebab itu hukum hudud tidak boleh dilaksanakan dengan adil,” katanya.

Bagaimanapun, dalam siri kempen PAS sempena dua PRK berkembar ini, Hadi menjelaskan akta yang dibentangkannya di Parlimen bukannya hudud.

Sebaliknya ia Rang Undang-undang (RUU) Persendirian untuk meminda Akta 355 Mahkamah Syariah.

Copyright (C) 2009-2016 MToday News Sdn. Bhd. All Rights Reserved.

Source: <http://www.freemalaysiatoday.com/category/bahasa/2016/06/11/hadi-jadikan-sokongan-najib-talian-hayat-pas-tun-m/>